

BOSNA I HERCEGOVINA  
APELACIONI SUD BRČKO DISTRIKTA  
BOSNE I HERCEGOVINE  
Broj: 96 o O 059560 18 GŽ  
Brčko, 12.12.2018. godine

Apelacioni sud Brčko distrikta Bosne i Hercegovine u vijeću sastavljenom od sudija Gligorević Ruže kao predsjednika vijeća, Kovačević Maide i Nedić Srđana kao članova vijeća, u ostavinskom predmetu iza umrle Š.R. rođ. V. kćerke S. iz B., odlučujući o žalbi nasljednika mlđb. K.N. iz B.2, zastupanog po zakonskom zastupniku, ocu K.M.2 iz B.2, izjavljenoj protiv rješenja o nasljeđivanju Osnovnog suda Brčko distrikta Bosne i Hercegovine, broj 96 o O 059560 14 O 2 od 09.08.2018. godine, na sjednici vijeća održanoj dana 12.12.2018. godine, donio je slijedeće

## R J E Š E N J E

Žalba nasljednika mlđb. K.N. se ODBIJA, rješenje o nasljeđivanju Osnovnog suda Brčko distrikta Bosne i Hercegovine broj 96 o O 059560 14 O 2 od 09.08.2018. godine POTVRĐUJE.

## Obrazloženje

Prvostepenim rješenjem o nasljeđivanju raspravljena je zaostavština iza umrle Š.R. rođ. V., na način što je stavom I. utvrđeno da zaostavštinu čine pokretnine, neisplaćena novčana sredstva kod N.B.a.d., te putnički automobil marke V. (sa ostalim podacima kao u izreci rješenja), dok je stavom II. navedena imovina uručena zakonskim nasljednicima, između ostalog i unuku K.N. (M.2) sa dijelom od 1/12.

Protiv navedenog rješenja blagovremenu žalbu je izjavio zakonski zastupnik mlđb. nasljednika, otac K.M., ne navodeći određeno razloge zbog kojih pobija prvostepeno rješenje, ali sadržajno ukazujući da ga predmetna imovina ne interesuje, što bi upućivalo da se ne prihvata nasljedstva na imovini ostaviteljice, kao niti da zna šta predstavlja predmet zaostavštine.

Žalba nije osnovana.

Kako je naprijed navedeno, pobijanim rješenjem je raspravljena zaostavština ostaviteljice, utvrđen predmet zaostavštine (pokretna imovina), te je ista uručena zakonskim nasljednicima, pa između ostalog i mldb. K.N., koji se nije odazivao na pozive suda, odnosno njegov zakonski zastupnik, a shodno odredbi člana 133 Zakona o nasljeđivanju SR Bosne i Hercegovine („Službeni list SR Bosne i Hercegovine“, broj 7/80 i 50/80) kojom odredbom je propisano da zaostavština umrle osobe prelazi po sili zakona na njegove nasljednike u trenutku njegove smrti.

Prvostepeni sud je pravilno primijenio materijalno pravo kada je pripadajući (zakonski) dio imovine uručio zakonskom nasljedniku, mldb. K.N. koji je putem zakonskog zastupnika uredno obaviješten o ročištu na kojem se raspravljala zaostavština, pa kako se nije odazvao pozivu suda, iako je uredno obaviješten, niti dostavio nasljedničku izjavu, ima se smatrati da se prihvata svog nasljednog dijela koji mu po zakonu pripada (član 10, 11 i 133 Zakona o nasljeđivanju) na imovini ostaviteljice, koja je na jasan način utvrđena stavom I pobijanog rješenja.

Navodi iz žalbe iz kojih se isčitava i da zakonski zastupnik mldb. nasljednika nije zainteresovan za predmetnu imovinu ne utiču na pravilnost i zakonitost prvostepenog rješenja, obzirom da je odredbom člana 243 stav 2 Porodičnog zakona Brčko distrikta Bosne i Hercegovine („Službeni glasnik Brčko distrikta Bosne i Hercegovine“, broj 23/07) propisano da samo sa odobrenjem organa starateljstva roditelji mogu preduzimati pred sudom ili drugim organima procesne radnje koje se odnose na imovinu djeteta (a to je i imovina koja mu pripada po Zakonu o nasljeđivanju), što znači da zakonski zastupnik mldb. nasljednika se mogao odreći nasljedstva, ali tek sa pribavljenim odobrenjem organa starateljstva.

Međutim, nije na odmet istaći da zakonski zastupnik (otac mldb. nasljednika) takvu izjavu može dati u postupku diobe, odnosno uručenja imovine uz saglasnost organa starateljstva.

Slijedom navedenog valjalo je žalbu kao neosnovanu odbiti primjenom odredbe člana 344 stav 1 tačka 2 Zakona o parničnom postupku Brčko distrikta Bosne i Hercegovine („Službeni glasnik Brčko distrikta Bosne i Hercegovine“, broj 8/09, 52/10 i 27/14) u vezi sa članom 2 Zakona o vanparničnom postupku Brčko distrikta Bosne i Hercegovine („Službeni glasnik Brčko distrikta Bosne i Hercegovine“, broj 2/01).

PREDSJEDNIK VIJEĆA

Ruža Gligorević